

თანამედროვე მსოფლიოს შვიდი საოცრება

მაია ბლიაძე

თითოეულ ჩვენგანს გაუგონია, რომ ძველ სამყაროში არსებობდა მსოფლიოს 7 საოცრება. პირველი ცნობები მათ შესახებ ძველი ბერძენი მეცნიერის ჰეროდოტეს ნაშრომებში გვხვდება, რომლებიც ჯერ კიდევ ჩვენს წელთაღრიცხვამდე მე-5 ათასწლეულში დაიწერა. ჰეროდოტემ სცადა, დაეჯგუფებინა იმ დროისთვის არსებული უდიდესი ნაგებობები, რომლებიც განსაკუთრებულ შთაბეჭდილებას ახდენდა მნახველზე. მან მხოლოდ გამორჩეული საინჟინრო კონსტრუქციების სია კი არ შეადგინა, არამედ აღწერა კიდევ ისინი. სამწუხაროდ, ამ ნაშრომებს ჩვენამდე არ მოუღწევია - ისინი ალექსანდრიის ბიბლიოთეკაში გაჩენილმა ხანძარმა იმსხვერპლა სხვა, არანაკლებ ფასეულ ხელნაწერებთან ერთად.

ამ სიის კიდევ ერთი ვერსია ძვ. წ. II საუკუნეში შექმნა ანტიპატე სიდონელმა. სია ბერძენ მოგზაურთა აღწერილობებსა თუ გადმოცემებს ემყარებოდა. მასში მხოლოდ ის ქმნილებები შევიდა, რომლებიც ხმელთაშუა ზღვის ქვეყნებში მდებარეობდა, ანუ იქ, სადაც იმდროინდელ მოგზაურებს მეტ-ნაკლებად უსაფრთხოდ მოგზაურობა შეეძლოთ. სიაში შესული ობიექტები საოცრებებად იმ კრიტერიუმით იქნა მიჩნეული, რომ იმ დროის ყველაზე პოპულარული ღირსშესანიშნაობები გახლდათ. აღსანიშნავია, რომ ანტიპატე სიდონელის სია მხოლოდ ადამიანის ქმნილებებს აერთიანებს, ვინაიდან ბუნებრივი საოცრებები იმხანად პოპულარული არ იყო.

ძველი მსოფლიოს შვიდი საოცრება

საოცრება	თარიღი	მშენებელი	დაინგრა	მიზეზი
ხეოფსის პირამიდა	ძვ. წ. 2550	ეგვიპტელები	დღემდე დგას	-
ბაბილონის დაკიდული ბალები	ძვ. წ. 600	ბაბილონელები	ძვ.წ. I საუკუნე	მიწისძვრა
ეფესოს ტაძარი	ძვ. წ. 550	ლიდიელები, ბერძნები	ძვ. წ. 356 წ.	ხანძარი
ზევსის ქანდაკება ოლიმპიაში	ძვ. წ. 435	ბერძნები	V-VI საუკუნეები	ხანძარი
ჰალიკარნასის მავზოლეუმი	ძვ. წ. 351	ქარიელები, ბერძნები	1494 წ.	მიწისძვრა
როდოსის კოლოსი	ძვ. წ. 292-280	ელინისტური საბერძნეთი	ძვ. წ. 224 წ.	მიწისძვრა
ალექსანდრიის	ძვ. წ. III	ელინისტური ეგვიპტე	1303-1480 წწ	მიწისძვრა

ამჟამად მხოლოდ ერთი მათგანი - ხეოფსის პირამიდაა შემორჩენილი გიზაში (ეგვიპტე). დაკიდული ბალების არსებობის დამტკიცება ვერ მოხერხდა. დანარჩენი ხუთი საოცრება, უძველესი დოკუმენტური მასალის მიხედვით, ბუნებრივმა კატაკლიზმებმა იმსხვერპლა: ეფესოს ტაძარი და ზევსის ქანდაკება ხანძარმა გაანადგურა, დანარჩენები კი მიწისძვრამ.

დღეს თამამად შეიძლება ითქვას, რომ მსოფლიოს შვიდი საოცრება ძველი სამყაროს სავიზიტო ბარათია, რადგან ესენია ადამიანის ხელით აგებული ყველაზე მასშტაბური და გრანდიოზული ხუროთმოძღვრული ქმნილებები.

ძველი მსოფლიოს შვიდი საოცრების ანალოგიით მრავალი სხვა სიაც შექმნილა, რომლებშიც, ადამიანის საინჟინრო მიღწევებთან ერთად, ბუნებრივი საოცრებებიც არის შესული, თუმცა ეს სიები უფრო არაფორმალურია და მათ შესახებ რაიმე კონსენსუსი არ არსებობს. განვიხილოთ ზოგიერთი მათგანი.

- თანამედროვე საოცრებები - სამოქალაქო ინჟინერთა ამერიკის საზოგადოების მიერ შედგენილი თანამედროვე მსოფლიოს შვიდი საოცრების სია: ლა-მანშის გვირაბი, ტორონტოს ტელეანმა, ემპაია სტეიტ ბილდინგი, გოლდენ გეიტ ბრიჯი, იტაიპუს კაშხალი, დელტაპროექტი, პანამის არხი.

- მსოფლიოს ტურისტულ საოცრებათა სია - ჰილმან უონდერსის მიერ შედგენილი ყველაზე პოპულარული შვიდი ტურისტული ღირსშესანიშნაობის ჩამონათვალი: ხეოფსის პირამიდა, ჩინეთის დიდი კედელი, თაჯ-მაჰალი, სერენგეტი, გალაპაგოსი, დიდი კანიონი, მაჩუ პიკჩუ.

შეთანხმება არც მსოფლიოს შვიდი ბუნებრივი საოცრების შესახებ არსებობს, ვინაიდან არ არის დადგენილი, რამხელა უნდა იყოს ეს სია. ერთ-ერთი ასეთი სია CNN-მა შეადგინა: დიდი კანიონი, დიდი ბარიერული რიფი, რიო-დე-ჟანეიროს ყურე, მთა ევერესტი, ჩრდილოეთის ციალი, პარიკუტინის ვულკანი, ჩანჩქერი ვიქტორია.

წყალქვეშა საოცრებათა სიის წყარო გაურკვეველია, თუმცა ის საკმაოდ ხშირად ფიგურირებს მასმედიაში და ამიტომაც აღნიშვნის ღირსია: პალაუ, დიდი ბარიერული რიფი, გალაპაგოსის კუნძულები, ბაიკალის ტბა, წითელი ზღვა.

„თანამედროვე მსოფლიოს შვიდი საოცრება“ არასამთავრობო ორგანიზაცია New Open World Corporation (NOWC)-ის მიერ ორგანიზებული პროექტია, რომელიც შვეიცარიელი ბერნარ ვებერის ინიციატივით დაიწყო. ახალი მსოფლიოს 7 საოცრება შეირჩა მსოფლიოს ცნობილი არქიტექტურული ნაგებობებიდან სატელეფონო მესიჯებითა და ინტერნეტით. 2007 წლის ივლისში ლისაბონში გამოქვეყნებული ინტერნეტგამოკითხვის შედეგების თანახმად, რომელიმე ასმა მილიონმა კაცმა მიიღო მონაწილეობა, შედგენილ იქნა ასეთი ჩამონათვალი:


სახელწოდება	რეგიონი	ადგილმდებარეობა	ფოტო
ჩინეთის დიდი კედელი	აზია	ჩინეთი	
კოლიზეუმი	ევროპა	იტალია, რომი	
მაჩუ-პიკჩუ	სამხრეთ ამერიკა	პერუ	
პეტრა	აზია	იორდანია	
თაჯ-მაჰალი	აზია	ინდოეთი, აგრა	
ქრისტეს ქანდაკება	სამხრეთ ამერიკა	ბრაზილია, რიო-დე-ჟანეირო	
ჩიჩენ-იცა	ჩრდილოეთ ამერიკა	მექსიკა, იუკატანი	







თანამედროვე მსოფლიოს შვიდი საოცრება მსოფლიოს რუკაზე:



ფინალისტთა სიაში ასევე მოხვდა აია-სოფიას ტაძარი (თურქეთი, სტამბოლი), ათენის აკროპოლისი (საბერძნეთი, ათენი), ალგამბრა (ესპანეთი, გრანადა), ანგკორი (კამბოჯა, ანგკორი), მოაის ქანდაკებები (ჩილე, ალდგომის კუნძული), მოსკოვის კრემლი და წითელი მოედანი (რუსეთი, მოსკოვი), ნოიშვანშტაინი (გერმანია, ფიუსენი), გიზის პირამიდები (ეგვიპტე, გიზა), სიდნეის ოპერის თეატრი (ავსტრალია, სიდნეი), თავისუფლების ქანდაკება (აშშ, ნიუ-იორკი), სტოუნჰენჯი (გაერთიანებული სამეფო, უილტშირი), ტიმბუკტუ (მალი), კეიმიძუ-დერას ტაძარი (იაპონია, კიოტო), ეიფელის კოშკი (საფრანგეთი, პარიზი).

კონკურსის შედეგად დასახელდა ბუნების ახალი 7 საოცრებაც (New seven wonders of nature). პროექტმა სტარტი 2007 წლის 7 ივლისს აიღო და კანდიდატების წარმოდგენა და პირველადი წინასწარი შერჩევა 2009 წლამდე გაგრძელდა. შედგენილ იქნა შორტლისტი, რომელიც 77 კანდიდატს აერთიანებდა. 21 ივლისს კონკურსის ექსპერტთა საბჭომ მათ შორის 28 შეარჩია, რომლებიც საყოველთაო კენჭისყრაზე დაიშვა. ხმის მიცემა 2011 წლამდე გაგრძელდა და საბოლოო ნუსხაც დასახელდა:

დასახელება	ტიპი	ადგილმდებარეობა	ფოტო
ამაზონი ამაზონის ჯუნგლები	და მდინარე, დაბლობი	ბოლივია, ვენესუელა, პერუ, სურინამი, ბრაზილია, გაიანა, კოლუმბია, გვიანა,	

		ეკვადორი	
ჰალონგის უბე	უბე	ვიეტნამი	
იგუასუ	ჩანჩქერი	არგენტინა, ბრაზილია	
ჩეჯუს კუნძული	კუნძული	კორეის რესპუბლიკა	
კომოდო	ეროვნული პარკი	ინდონეზია	
მიწისქვეშა მდინარე პუერტო-პრინცეცე	კარსტული მღვიმე	ფილიპინები	
მაგიდას მთის ეროვნული პარკი	ეროვნული პარკი	სამხრეთ აფრიკის რესპუბლიკა	

ამავე სიის კანდიდატები იყვნენ:

ევროპა: აზერბაიჯანის ტალახის ვულკანები, ასკანია-ნოვას ნაკრძალი უკრაინაში, მყინვარი ალექსი შვეიცარიაში, ან-სიუ-ლესის მღვიმე ბელგიაში, აფროდიტეს კლდე კვიპროსზე, ბალატონის ტბა უნგრეთში, ბამბის ზღვა დანიაში, ნიდერლანდსა და გერმანიაში, ვულკანი ვეზუვი იტალიაში, გიბრალტარის კლდე გიბრალტარში;

აზია: მესოპოტამიის ჭაობები ერაყში, მომღერალი ბარხანი ყაზახეთში, ბაიკალის ტბა რუსეთში, მდინარე განგი ინდოეთსა და ბანგლადეშში, მწვერვალი ჯომოლუნგმა ნეპალში, კაბადოკიის კლდეები თურქეთში, მალდივის კუნძულები, მკვდარი ზღვა ისრაელს და იორდანიაში, კუნძული ჩერჯუ სამხრეთ კორეაში;

აფრიკა: მაგიდა მთის ეროვნული პარკი სარ-ში;

ოკეანეთი: კუნძული აიტუტაკი, კუკის კუნძული, ახალი კალედონიის ბარიერული რიფი, კუნძული ბიკინი მარშალის კუნძულებზე, კუნძული ბორა-ბორა ფრანგულ პოლინეზიაში, დიდი ბარიერული რიფი ავსტრალიაში, აღდგომის კუნძულის ეროვნული პარკი, ულურუს მთა ავსტრალიაში, კუნძული ფუნაფუტი ტუვალუში;

სამხრეთი ამერიკა: ამაზონის დაბლობის ჯუნგლები, ჩანჩქერი ანხელი ვენესუელაში, უდაბნო ატაკამა ჩილეში, გალაპაგოსის კუნძულები ეკვადორში, ცეცხლოვანი მიწის კუნძულები ჩილესა და არგენტინაში, მყინვარი პერიტო-მორენო არგენტინაში, ტბა ტიტიკაკა ბოლივიასა და პერუში და სხვ.